

乾隆壬辰春鐫

# 真如里志

後樂堂藏板

## 真如里志序

吾邑之西北隅有市曰真如為上嘉  
出入要道編氓鱗比商賈麇聚號  
稱巨鎮其地屬婁之寶山距吾邑  
一舍而近家從姪呂班徙居之歷  
有年所歲時往還輒道其鄉文



獻之盛而惜邑志之多滲漏也余  
心識之自官 京師忽，六易寒  
暑今秋奉

命典試兩浙歲事還

朝身次吳門適价人來謁出所作  
真如里志請序志凡四卷有綱有

目一展卷而里之聲明文物瞭然  
在目與嚮之所聞歷，不爽近世  
郡邑乘類多而握簡者或不諳  
史例掇拾陳言以多為貴識者  
嗤之比為騰史牘斷爛朝報先  
文裕公有言史以繼往而志以開

來尤當嚴辨體例此言實為作  
志之圭臬是編簡古不失史法而  
考訂精詳足備邑乘之採一方  
之文獻賴以不沒侷人之功於鄉  
里豈不大哉侷人為呂班冢子齒  
亞于余日夜砥礪思繼先文裕之

舊學著述當未可量余也遭時  
忝竊王事馳驅不暇任文字之役  
率筆作序正先文裕所謂風沙  
淖靡之習不為內愧云  
乾隆三十三年歲在戊子秋九月  
上吉上海耳山陸錫熊書



寶山陸子价人纂真如里志成問序於余、讀之喜其事之極而詞之簡也為之序曰志何昉乎周禮春官之屬小史掌邦國之志自王國至侯國各件繫其行事而志以稱焉左氏所載周志鄭書是也今之郡縣視古侯國其有志焉宜也下此若邨墟市鎮與夫一山一水之勝既載于郡邑又從而志之不幾濫觴乎然小者大之微里志雖微可備郡縣之採擇故如甫里巖市龍岡笠澤諸志其體例嚴其文詞贍亦足以存而不廢也真如為寶山之下里幅隕甚隘而自

真如里志

張序

南宋迄國朝聲明文物之盛甲于諸鎮其間之潛  
德幽貞有郡邑志所不勝載者陸子居是鄉懼文獻  
之無傳為之周咨博訪搜羅擴摭分門別類輯成一  
書其用心亦良苦矣嗚呼古今來之著述蓋難言之  
專已病其師心徇人同於築室凡書皆然志為甚陸  
子是作不立異不苟同發凡起例悉做郡邑志乘叙  
事一本龍門家法而變通之寬而不靡嚴而有法誠  
足為閭里之信史傳諸後而無疑矣何不可與甫里  
諸書並為大雅所重哉陸子祖籍海上為詹事文裕

公裔孫屢試鎖闈興會標舉行且置身清時簪筆  
石渠天祿為一代作手茲編其嚆矢也余不才困守  
寢邨慨三槎之文獻散佚竊不自量欲踵前賢之志  
而甄綜之人事牽率沆無所就覩陸子是志之成不  
覺慙然其增愧已  
乾隆辛卯孟冬既望嚶槎蒿廬學者張承先拜手譔



吾里去邑治四十二里以真如寺得名也其望入三  
輻輳廛舍綿延自勝國迄今以勲業文章著見者凡  
幾輩惜無有人焉將俗尚之變物土之宜與夫人文  
之崛起事類之錯出者綜覈叅攷彙萃成帙以備郡  
邑志之採擇也立竊不自揣網羅撫拾撰志二十七  
篇沿革里至具書風俗節序並載原始末也物產衣  
食所從出也水道旱潦所由備也蹟之古者名亦古  
地以物傳也進此則有小學以造士也有營汛以衛  
民也坊表墟墓過者式瞻也橋梁寺觀游者憑眺也

真如里志  
若夫掇巍科登臚仕忠孝懋著以至逸士高人窮一經名一藝青閨矢節之死靡他皆閭里之榮邦家之光也而寓公方外例得附也祥異識其槩不厭詳也藝文存其目不勝載也他若神奇幽怪之事風教攸關亦考古者所不廢故以軼事終也凡此遠者本郡邑之乘近者得耆舊之傳不敢以時損益不敢以意增刪蹟著其實事舉其衷也編次既竣敢求博雅君子賜加釐正勒成一書傳之久遠庶使溯古者得所考採風者有足徵也

乾隆辛卯陽月里人陸立謹識



凡例

一此志經始乾隆乙酉閱六載告竣稿凡七易顧學識淺陋挂漏良多嗣有見聞容再補入

一志貴傳信於事核實於辭尙簡不匿美不虛譽一切體裁悉遵邑志

一風俗節序物產詳具邑志茲編所載一標俗尙一著專產餘俱從畧

一列女載已 旌貞節外有苦志冰心與例相符者亦錄大畧不拘生不立傳之例



一橫港嚮載大場志然以地之相去較之於吾里為近茲特廣徵編入

一吾家自先明經隨庵先生以下假館里中來往風流今猶膾炙人口例得倩友填諱附寓公後

一藝文非專集而言關里之人與事與地者附於本事之下各以類編入

一此藁詳畧去取折衷文獻課餘繙閱筆削時加近復偕同學諸子叅互再四而後授梓綦慎之也殫心商確張子誦芬之力居多

叅閱

甘宗懋楚譽

陸辰華漢表

上海陸秉笏長卿

侯滄西峯

管中豹心裁

嘉定陳時雍光被

嘉定陳時叙虞百

歸涵淳澣

林丙鸞赤鳳

嘉定張承先誦芬

張為金粹剛

黃世業克家

李永繼續先

甘泉禮祥

李紹昌元振

陳時倫際良

嘉定 陳一豹蔚南

侯世欽奉若

倪培曾振宗

嘉定 張成圭季遠

目錄

第一卷

沿革

里至

風俗

節序

物產

水利

古蹟

小學

營汛

坊表 附第宅園亭

墟墓

附義塚

橋梁

寺觀

附宗祠

嘉定 陳一豹蔚南

侯世欽奉若

倪培曾振宗

嘉定 張成圭季遠

目錄

第一卷

沿革

里至

風俗

節序

物產

水利

古蹟

小學

營汛

坊表

附第宅園亭

墟墓

附義塚

橋梁

寺觀

附宗祠

第二卷

科貢

宦達

隱逸

第三卷

孝義

藝術

第四卷

流寓

祥異

賑卹附

軼事

封贈

忠節

文學

列女

方外

藝文

真如里志卷一

里人陸立价人編輯

沿革

真如鎮以寺名在唐爲崑山縣之臨江鄉南宋嘉定十年始置嘉定縣領之歷元明至國朝雍正三年復析嘉定東境建寶山縣真如遂改屬焉其地近海嘉上兩邑往來孔道客商輳集漸成巨鎮中界桃樹浦別名桃溪

陸文然集唐詩今市猶存古剎名一溪寒水淺深清如何待到清明日夾岸桃花錦浪生

里至

東西廣二里

南北袤一里

東抵彭越鎮十二里

西抵柵橋鎮十二里

南抵界浜三里

北抵橫港五里

東南抵潭子十二里上海縣治二十四里

東北抵大場鎮十二里本縣治四十二里

西南抵牧童港口五里

西北抵南翔鎮二十四里嘉定縣治五十里太倉州

城八十四里

風俗

真如僻在邑之西南自成市鎮士習詩書農勤耕織  
 百工商賈各務本業安分守已尚已而漸染海濱  
 惡習大為民害者曰打降訟師賭博匪竊掠販訪  
 行六者之為害夫人知之夫人能言之今經歷任  
 賢侯嚴有多方懲治打降訟師稍知斂跡而賭竊  
 掠販猶未革心至訪行一欸類多砌陷自大興舒  
 公痛革以來積弊頓絕

節序

四月八日釋伽佛誕前後數日名香信懸燈演劇賽會迎神士女進香填塞道路

九月九日登寺之大悲閣曰登高以里無山阜也

施燧詩風雨重陽梵閣清招尋緣此盡同聲乍黍禪指看旛動纜近魁杓徹部明燄起祖龍消字劫香生詩偈避魔兵如何只佩茱萸飲不挽桃溪滌世情

物產

棉花 色有紫白種有早晚以供紡織且資遠販公私賴之

稻 種有早晚名色不一土燥工繁里鮮播種

麥 有大小三種

蠶豆

豆

菜

瓜

蘿蔔

燕笋

護居笋

俗呼哺雞出徐家橋者佳

梅

桃

李子

有粉紫黃姑諸名實大而脆味極甘美遠勝他處

金銀花

天花粉

秋粉

以小麥麩澄粉為之狀如銀絲馳名吳郡

標布

紫白二色比戶織作晝夜不輟暮成疋布晨易錢米以資日用

紗

一手撚三紗以足運輪八勞工敏無頃刻間

花衣

水利

桃樹浦

浦種桃樹故名南南至虬江經牧童港出吳淞江北達走馬塘南北十里舟楫往來晝夜不絕

明嘉靖四年天啟七年國朝康熙二十三年四十九年雍正九年疊次開濬乾隆二十五年

犁轅浜

一名梨園濬自明季日久淤塞漸成平陸乾隆二十五年濬

虬江

一名舊江雍正九年濬桃浦經入牧童港處乾隆二十五年照式重濬

桃浦潭

俗名羊腸浜

界浜

金鷄浜

鎮西支河雍正九年庠生甘實學呈濬

大場浦

鴉鵲浜

蔡家浜

小虬江

趙浦

西浜

橫浜

雙浦

秦公浦

吾尙浜

橫港

一名南化

古蹟

古桂

里東北侯氏宅高數丈大數圍蔭五畝花有紅黃白三色宋時植

嘉定李更詩故家喬木幾存亡古桂巋然表一方已謝斧斤成偉榦不妨風月老窮鄉花時游屐千



真如里志

卷一 小學

營汛

四

村合竹下移樽十里香自笑隔  
隣來較晚獨吟秋水嗅殘芳  
大銀杏 東里社祠前高數丈  
圍四丈餘宋時植

小學

真如小學 明嘉靖十三年邑令李公資坤分真如寺  
址建凡十二楹置田四十畝廩一區七舍

李重有記  
萬歷年廢

營汛

真如汛 乾隆五年設

坊表 附第宅  
園亭

我豸坊 為御史陳述建今廢

貞女坊 為諸生甘應麒聘妻徐氏建廢

節孝坊 凡十 一為候選縣丞於景濂妻倪氏 一為張大烈妻陶氏 一為張文達妻李氏 一為程溥妻符氏 一為管文燠妻孟氏建

為張文達妻李氏 一為王志鳳聘妻嚴氏 一為程溥妻符氏 一為管文燠妻孟氏建

雙節坊 為桂元彩妻楊氏及元彩弟庭彩妻李氏建

貞節亭 為江楨妻趙氏建

陳叅政第 廢

桂花亭 李氏故居廢

池上閣 姚氏故居

施燧往姚菊文宅看古桂一樹能籠大小山恰逢  
秋半可人攀香浮綠蟻來天上枝舞蒼虬入座間

真如里志

卷一 坊表

五

招隱何心成往事梯雲仍願附仙班  
斜陽水閣辭姚合携取寒稜待月還

六合齋 林氏別業廢

范家園 廢

南圃 李栻別業今存舍月堂

符兆昌詩青山無恙故人來啟闢林泉畫裏開歌  
響出雲驚睡鶴陽回動地起春雷風清韻繞墻頭  
竹月白香浮屋角梅佇看四  
時花發處一樽隨意破蒼苔

梅園 有二俱侯氏別業

來鶴樓 張雲章讀書處

孫家園

梅竹居 王氏別業

墟墓 附義塚

古墓

管衙後以銅索懸棺見者欲  
鑿取里老止之掩築如故

侯墓

明邑人翟校志孺人諱潤字玉潤嘉定人故監察  
御史徐公博兄子鞠於其配張夫人者也孺人性  
孝謹頗曉書義年十六歸桃溪為元海漕萬戶侯  
彥暉之孫廷昭妻勤婦工俾廷昭得專其業補縣  
諸生舅歿養其姑以老及姑之喪適廷昭南試孺  
人泣治舍斂無違禮廷昭數奇不偶孺人温諭勸  
進問謂曰妾不德將餒爾先能無院於爾先乎乃  
納少室於宋於茶成有出也以宏治年月日卒正  
德壬申十一月葬大塲浦西先塋  
後廷昭膺恩典而孺人已亡矣  
陸立詩荒邱陸爾起層樓玉果難逢五百  
秋豈是夜臺憐寂寞故教歌舞占風流

叅政陳述墓

南桃樹浦

侯安敬墓 金鷄

張淵墓

橫港

歸墓 南石路

甘素朴墓金鷄浜南孫鄉飲賓爾恢附

張西溪墓桃浦鄉賢周之謨題墓道

樂昌知縣丁文偉墓梨轅

吳惺心墓虬江子司城際明附 陳忠墓桃浦

鎮國將軍張涵衣冠墓北桃浦

侯瑗墓器字圩孫侯推都司廷采元孫州同知瑞璧附

鄉飲賓張昶墓橫港口子文學履素友貞敏中州同知李煥附

侯安國墓界

陸文然詩奕世烝嘗祀事修離離蔓草剩荒邱他年誰握中郎筆片石標題姓氏留

貢士姚斌墓桃浦東 昌化知縣倪士鈴墓桃浦

鄆城知縣於景熹墓夜號六畝

文學孫寄園墓板橋有大楠樹

金節母陳氏墓

廿日嘉詩敗壁孤燈六十秋一杯埋玉暮雲愁行人不曉綱常重但說真娘葬虎邱

徵士張雲章墓橫港子太學體方靖方任縣知縣揆方附

嚴貞女墓北桃浦 貢士陸傳慎墓板橋

李信孚墓大場

張揆方詩中書公後代多賢記侍先生弱冠年古貌古心堪勵俗肯堂肯構善承先虬江地氣醇還

厚桃水源流清且漣電安於斯借伉儷既安既固萬年阡

宜興教諭侯瑞隆墓

江虬

義塚

有三生九畝田九分二厘李時珍置又田四畝七分二厘邑令劉公叔堂置夜號東五

圖田一畝甘實學置

橋梁

香花橋

宋嘉定建國朝乾隆二

陳忠菴橋

雍正間徽籍州同知朱旭章捐募易石

扶欄橋

乾隆二十六年修

通濟橋

鎮安橋

明成化四年建

袁家木橋

楊家橋

許家橋

康熙間諸雲九建乾隆六年醫士金雨三募楊君尙修

八字橋

莊家橋

李家橋

積善橋

積德橋

舊設閘於此

蔡家橋

嚴家橋

周安橋

侯家橋

新橋

元元觀橋

天成橋

乾隆十五年李文益楊譽聞建

奚家杠橋

徐家橋

過往橋

上三橋雍正  
年李君實建

嚴家橋

侯家橋

白塔橋

凌家橋

祠堂橋

陸典橋

潭子橋

童家橋

天后宮橋

姚培棠撰  
文募建

錢家橋

磚橋

張元吉  
募石

厚生橋

張謙捐  
募石

陣勢橋

以宋韓世忠列  
陣其地故名

陸仰止橋

玉蟹橋

雙浦廟橋

乾隆三十  
五年修

東作西成橋

甘肅  
新建

板橋

靜室橋

北龍橋

乾隆三十年  
姚秉仁建

南龍橋

乾隆三十五  
年姚時瑞建

寺觀

附宗  
祠

真如寺

一名萬壽俗名大寺舊在官場宋嘉定間僧  
永安以真如院改建元延祐間僧妙心移建

桃園浦請額改寺明洪武宏  
治間僧道馨法雷兩次修建

明邑侯王應鵬詩使節匆匆向晚過香烟入戶  
繞松蘿等幽直到雲深處中有高僧寫具多

韋陀殿

雍正六年  
陸偉功修

送子觀

觀音殿  
雍正間李  
泰和修

大雄寶殿

大悲閣

乾隆十年火燬重建

東嶽行宮

忠顯王殿

鄂王殿

文昌祠

財神殿

地藏殿

西方境

上二所乾隆九年楊君裔修

十王殿

禪堂

惜字藏

放生池

城隍行宮

祀明韓公成

痘司殿

官廳

以當道假館得名明上邑令黃希英手書雲深處匾額本朝乾隆三十三年重建

東里社祠

西里社祠

並祀漢曲逆侯陳平

關帝廟

東山州同知席紹裘捐田三畝

永寧禪院

明末甘陸侯三姓建僧淨源修國初陸允立同子邑庠生廷德增建茶亭

邑令宋爾瑜記邑之南距五十里曰真如鎮其地村落廻環人烟簇聚土敦而朴民愿而淳多隱者

居焉陸君允立其一也允立終身布衣不求聞達教子廷德蜚聲藝苑余以季試摸索得之不覺起

舞而允立父子更存心利濟憫行人之饑渴捐資改造茶亭於鎮之西據要道以濟之而赤日寒風

商旅之負荷竭蹶而來者不憂行路難矣昔范文正公為諸生時即以天下為己任陸生素嫻家訓

異日措之天下其民饑已饑民渴已渴者耶余聞之喜為之立石以記焉

長慶菴

元天歷二年僧了心建久廢

萬善菴

陳忠菴

靜室僧修

元元觀元至元三年道士沈仲寬建久廢今存祖師堂住持道會司徐際雲修

天后宮

趙浦廟

小場廟康熙間庠生浦潛蛟修

白塔廟明萬歷時建朝康熙初張履顯

重修張述之捐田曾在晉有記

明聖菴元皇慶二年僧寶月建

經堂

義井亭廟

秦公叔寶廟俗訛呼秦穆公

張承先秦公廟銀杏詩奇樹凌烟種參天百尺強風霜經五代雨露憶三唐鴨腳濃陰合虬髯老幹張可憐桃李世爾色獨蒼蒼

靈菴

雙浦廟

甘露菴甘爾新同僧祖機建已廢今存許氏捐建聽房三楹

夏家菴乾隆三十年夏文彩建

草庵廢

上谷宗祠侯安國建

范氏宗祠范裕寧建祀宋文正公廢

渤海宗祠甘日嘉建

清河家祠橫港

管氏宗祠管街

李氏家祠李文益建

真如里志卷二

里人陸立价人編輯

科貢

進士

李良

明成化五年己丑張昇榜見宦達傳

李嘉猷

字符功昭毅將軍正義子本朝康熙十五年丙辰彭定求榜候補內閣中書

舉人

李良

成化四年戊子

李直

字舜臣良弟成化十三年丁酉貢志豪舉

不飭廉隅淡於勢利一上春官下第遂不仕

侯泰

字安甫正德八年癸酉歷任兗州府通判



甘元儒 正德十一年丙子見宦達傳

李重 嘉靖十三年甲午見宦達傳

張槎 萬曆七年巳卯

丁文偉 字無采一字涵宇萬曆三十一年癸卯

卯仕樂昌縣知縣

李嘉猷 順治十四年丁酉順天中式

於景熹 字紫來康熙三十二年癸酉經魁選授鄆城縣知縣著於經魁稿

陸天錫過於經魁村居晴郊隱約碧溪傍高下踈林葉半黃秋老蒼葭初度雁烟消別浦乍凝霜一堂式好歌棠棣十載相思賦隰桑叢

菊正開同晤對却令笑語亦含香

張揆方 康熙五十六年丁酉順天經魁見父雲章傳

侯瑞隆 雍正四年丙午見文學傳

明經

侯爵 字良貴泰父成化二十一年貢遂於易學候選州判官

丁文偉 萬曆二十三年選貢 姚棻 字敬夫萬曆三十八年貢

侯紹烈 字述之泰孫萬曆四十八年貢任雲夢縣知縣

李棻 字易官嘉猷弟順治十八年貢議叙知縣舉鄉飲介賓

嘉定王翊過桃溪贈易宮詩相逢各垂老倍覺此宵情人澹同花意吟高失雨聲交從貧境合禪自醉鄉生落落真懷

抱無煩語不平

唐頎 字德倩康熙十五年貢 姚斌 字又武棻族子康熙四十三年貢

武科

王景職 見隱逸傳 侯廷采 字翰臣康熙八年巳酉候推都司九

江守江殷道  
有國士之目

科目一途吾里自故明迄

國朝人材輩出蟬聯不絕雍正丙午後科名寥落  
已四十餘載編次之下不勝盛衰之感明經  
武科與科目並重爰併書之

封贈

陳朴 以子述貴贈  
監察御史

李綱 以子良貴封  
刑部主事

封贈之典朝廷所以獎勵天下之為人父祖  
也吾里通籍者纍纍而前人之邀斯典者僅

二人是亦有命存焉爾

宦達

陳述字宗理讀書工詩長於吏事明宣德間以賢良  
薦授御史巡按江西歷浙江右叅政移四川左叅  
政會流賊剽掠官軍失利述至推誠招撫降者三  
百餘人皆釋歸復業殲渠魁五十人其地遂寧已  
而德陽賊燒劫什邡安縣移屯彰明述統官軍以  
正兵當賊衝復出奇兵撓之俾人自為戰所獲資  
畜輒以充賞不旬日悉平初蜀民不力本述為設

法勸課數年間農桑遍野民用饒裕撫臣累疏薦之晉階二品述以年老致仕蜀人立祠祀之本邑

### 祀鄉賢

陸立詩 嚶東先達半紆朱  
廡仕輸公冠海隅報國文章傳藝苑安邊經緯在成都  
旂常紀績風雲護俎豆酬勲典制符三百年來誰繼武一回追溯一長吁

李良字堯臣成化己丑進士仕南京刑部郎治獄不務鈎距而善窮人情大司寇重之諸曹疑牒輒移決焉出知瑞州府瑞俗獷悍喜告訐獄繫多至千人良至釋連坐與亡驗者而窮治其尤獄以衰息

民多逐末遠賈不歸良教之務農始相次復業值歲大祲爲長短補貸法全活甚衆民有掘地得窖中金者隸以私良良曰此天之惠我民也會父老而散之政暇輒進經生與宣暢疑滯析若解觿以憂歸徙嘉城子憲字大章上林苑署丞孫亨字嘉甫興寧縣主簿

甘元雋字舜登以鄉舉署定陶教諭遷知陵縣有清操耿介不阿失上官意罷歸四壁蕭然手不釋卷以詩名徙南翔卒有司爲之營葬

李重字威甫本農家不辨五穀博學強記人以奇詞  
奧義相質爲言見某書某卷歷歷無譌由舉人司  
長興縣教却諸生贊儀辨難經史多士悅服遷深  
澤知縣廉潔自持仍與經生討論不輟縣務委積  
尋解綬歸初民有善黃白之術者一豪公子求其  
方不與遂陷以大盜重廉得其情釋之及去任其  
人追送五十里外并獻其方重曰汝幾以此及禍  
奈何以禍我子孫焚之馬前而去祀長興名宦  
吳某字際明父惺心登仕籍際明少貢成均以軍功

任五城兵馬司忤權貴左遷日照尉廉明勤敏萊  
撫謝有經濟真才之目子某能文工書考授中翰  
從子盤陸立有吳司成傳

倪士鈞字岩三 國初諸生震子淵源家學幹練才  
猷太倉王相國揆器之以歸安丞署知昌化縣有  
德政子奕洵字眉望優於齒德例授八品章服  
丁毓秀字斐英少負雋才落魄不偶長游京師考授  
南陽府經歷遷陝西布政司經歷卒於任

侯傳山字硯陽性孝友以國子生試京兆學書於張

文敏照有詞翰名與修八旗志書成議叙裕州通判署襄城縣篆尊先賢崇名節歷任廉敏民咸德之持躬端恪居親喪不作佛事憂歸尋卒弟滄字西峯入太學肄業需次吏目

里雖蕞爾有明以來名臣循吏表著史冊為梓桑光寵繼自今人材迭出於以繼往而開來不更欣幸也哉

忠節

張涵字凝之邑諸生工詩詞書法精韜畧史閣部可法鎮揚州以禮聘之授都司條上便宜七事史公用其四晉游擊尋擢叅將分守揚州北門城陷死之

伏讀

欽定明史勝國死事諸臣直書不諱誠曠典也張將軍殉難揚州事具邑志及樸村集詳哉其言之有死無二其是之謂與

孝義

甘雷字桃園好義尚勇明嘉靖三十四年倭寇入嘉

境雷率同里高相等禦之奮勇居先殺傷無數倭設伏射中雷臂雷拔箭而進倭恐咤曰此壯士也不可與爭引去之邑賴以安時總督張經以雷績上聞曾經爲趙文華誣奏論辟章格不下

張炯字守郊篤於友愛尤好施與天啟中部議復漕炯偕邑人北上伏闕得著令永折族人相字望浦涵卽鎮國將軍親病無措咸割股以療元吉字慶來幼孤孝母兩舉鄉飲不赴橫港張氏世多孝義云

李正義字中宜嘗割股療母疾客蕪湖於旅舍得遺金百餘兩候三日有浙客倉皇至詢其實還之甲申歲饑民載道散給米糧疫死遺骸出資收斂國初隨征授都司管江寧撫院旗鼓事子嘉猷成進士棧貢士嘉舉邑諸生人以爲積德之報

張履素字子旦庠生父飲賓禔從嚴衍問學文行懋著履素七齡喪母哭踊如禮事後母至孝嘗登舟避亂母遺幼子於蓐履素排闥負之出適兵至義而去之子雲章

侯廷祥字永章廷采弟膂力過人不好凌物 國初  
 游兵過里荼毒居民廷祥忿甚會有恃酒行兇者  
 撻之於市用是其黨不敢滋橫土人賴之子榮字  
 聖約負意氣有節槩孝弟力田為鄉祭酒孫瑞隆  
 李時珍字育全治賈起家立名祇行壽臻耄耄邑令  
 查舉鄉飲賓子允新

明華亭董其昌詩方瞳浮碧髻仍青腰被盤囊五  
 岳形藏史由來從柱下修丹只合近滄溟蒼松肯  
 受秦皇爵玉樹能榮謝傳庭滿酌  
 流霞來介壽叢宵耿耿少微星

王樹聲字子實幼孤事母盡孝母病割左乳旁肉作

湯進之尋愈及破廬墓三年士大夫為詩歌贈之

南滙顧成天詩大孝有常經至性無守墨孺慕迫  
 中腸遑能顧成迹我讀孝子傳慨想常嘆息是非  
 聽諸人祇自竭其力諸兄盡名流此身捐可得皇  
 天鑒血誠病愈創亦釋藹然蒸太和友悌傳鄰邑  
 文孫念祖心  
 乞言當旌石

陸允立字茂椿好善樂施邑令宋給匾旌廬子廷德

字古隣工詩文尚氣誼有聲鄉校

嘉定馬翼壽陸茂椿詩葛巾野服晉風流閱歷人  
 間白日適黃菊杯前忘甲子青山社裏度春秋霞  
 霏絳氣侵書幌月冷金波映畫樓昨  
 夜蓬萊仙史到報言東海又添籌

甘爾恢字規先雷族子力行善事好施不倦邑令王

舉鄉飲賓子實學字儀青尊師傳課子孫孫宗起  
宗懋並游邑校有文望

侯瑞隆傳字內文明日啟愿懋日滴余生雖晚猶  
及見里黨壽耆有其行填填其貌顛顛守真抱璞  
永享大年者規翁先生為推首先生姓甘諱爾恢  
為余曾祖姑之壻家桃溪西世有隱德先生秉禮  
崇義積功累仁一鄉奉為祭酒闔邑稱為善人晚  
舉丈夫子儀青表叔蜚聲學校顯揚志切有司行  
鄉飲酒禮辟先生為介賓先生年屆杖朝碧瞳鶴  
髮優游捧爵坐享 恩榮引年尚齒記諸惇史可  
多得哉况文孫蔚起籍甚膠庠長日沛由澗芹首  
擷次日楚譽泮藻早舉雲來濟濟悉屬鳳毛福澤  
綿長詒謀永矣易曰積善之家必有余慶不信然  
歟以視市井中刻薄寡恩驟致千金輕裘肥馬顧  
盼自雄者奚啻天壤哉沛由請余為先生立傳因  
舉其樹德之深固世澤之綿遠以余童時所親炙

者縷陳之誌不忘若夫高堂大厦廣陌連

阡世俗驚為烜赫者余不敢贅一詞云  
尹聘壽鄉飲賓甘規先詩少壯純修積耆英重一  
鄉望顏遲近歲仰德幸隨行溫潤峴岡韞清和霽  
月光武漢溪桃索笑栗里菊貽香質行全師石無為  
雅好黃遂初孫賦美樂志仲言詳城府塵何有邱  
園味最長少微真燦燦南極正煌煌吉月冬之孟  
嘉賓禮用揚乞言還紀善鼓瑟更吹簧號賜逍遙  
得尊推齒德當定知  
仁者壽俾爾熾而昌

侯模字克中天性孝友父廷紹病稽顙北辰願以身

代潛割左臂肉作糜以療撫而弟體恤備至增置

祭田續修家譜好行懿德族鄙賴之子瑞璧字瑩

如考授清軍分府孫傳山



陸際恒字方來庠生廷德孫品行端方不苟言笑好禮義重然諾兩江總制黃舉善行給獎其門

李肇振字千仞嘉猷孫生長儒門深自謙益砥節礪行不涉外務與王飛筠道義相勗同舉鄉飲子朝宗能文早世

張維楨字以寧親病割股救之壽逾稀齡無疾卒同時李燭調玉葉士本葆初何均廷侯瑞琮象九時鎮寧遠李依永大千並以謹言修行見推里中又有姚秉仁字德修貢士棧裔孫孝親信友其質

行亦足多者

士君子敦倫飭紀奮其孝弟廉節之性爲里黨師表厥行偉矣吾愛之重之願吾曹共效之

隱逸

王景曦原名樹德字子萬崇正朝以錦衣衛武舉授千戶會上官疏請開墾瞿山卽以景曦爲屯田都司便宜行事功將就丁外艱遭鼎革家居杜門力田奉母以終張徵君雲章爲志墓弟樹勳字子貞

隱於醫卜嘗還人遺金

全王退尺牘舍弟子白歲暮持當物至槎溪典銀為柴米之需中途拾遺金二十錠遍訪亡金者還之而當物已不暇質矣歸語其故弟婦楊欣然也老母以弟婦之賢而樂不肖兄弟以老母之樂而樂古人云為善最樂不誣也

李允新字元映工文章策名成均籍甚六館為時相

倚重薦授中書會鼎革不就子符韜明揚從子際

際臨並有聲藝苑

侯瑞隆曰原任太醫院吏目育全李公以齒德舉鄉飲賓子允新由邑庠生貢入國學考授武英殿中書舍人與董文敏為僚婿外孫張徵君雲章為立傳孫符韜明揚際謙望著膠庠人比之河東三

鳳從孫際鼎亦庠生學問淹博長於史漢雲間進士徐天麟其弟子也歿後徵君為志墓世濟其美不獨一家之盛事云

天生斯人非徒使自有餘而已誠欲其出而有為也顧或道與時違勢有不得不高尙其事者則隱逸又足尙焉里雖褊小不乏其人例得書之

真如里志卷三

里人陸立价人編輯

文學

吳盤字又新際明從子隨任游北雍文望卓然教授  
當湖陸清獻公嘗從問字及清獻令嘉定延主幕  
席累辭不獲卒於嘉署

柯炯字以傳遠深經術兼通二氏學爲人虛和退遜  
嘗遊秣陵西湖故漳與騷人勝流詩歌酬答所至  
動人晚棄諸生自號可名公歿跡南翔里弟燠學

與烝等時號二柯

符兆昌字匡世淹貫經史名重一時張徵君稱其文  
踔厲風發詩歌清遠閒放與李際鼎方禹俱以學  
行爲人師云

俞煒字彤友苦志耽吟爲童子師侘傺以歿張徵君  
愛其詩囑王貢士輔銘選入練音集

張雲章字漢瞻父喪哭之幾喪明撫教弟雲從雲鳳  
雲蔚雲揚俾各有立爲文遠法蘇歐近宗熙甫以  
古文名世膺九卿薦徵至京師尙書館纂修事訖

告歸舉孝廉方正辭不赴卒學者私謚端文季子  
揆方字道營以鄉舉授任縣知縣老疾未任覃思  
著述人方之斜川云

侯楷字友培長於古學不求聞達上海陸叅議鳴珂  
顏其堂曰尙志弟林負美材亦以詩文自娛

汪之麟字天若長身玉立博學能文持躬復謹飭游  
京師王公大人咸以大器期之惜未展其材而歿  
姚宏榮字尙友廩生于佶子爲文有大家風範院試  
屈居武庠非其志也時槎溪李覲光三試冠軍俯

視儕輩邑侯王季試拔宏榮第一李慙且服同時

繆廷宣字聲遠篤志好學以詩古名

俞煒因繆聲遠過存得長句靜對閒窗歷雨晴檻  
花檐鳥不寒盟喜無樽酒資狂態賴有詩篇適野  
情才鈍一身天地小家貧數口雪霜清  
與君采藥爲長策溪岸繽紛記落英

李肇夏字西聞嘉猷從孫博學好古應京兆試闈中

擬元書翰與王司農圖炳齊名日下有江南小李

之目族人炳字孚五詩文敏絕以明經終

侯瑞隆字符五自幼力學通百家書詩古文詞信筆

直書不假雕琢而典贍可誦七上公車未第家居

教授造就多知名士晚授宜興教諭 命下已病

卒

沈步青字天申性穎敏坦易於書無所不窺兼通方

脉決生死不爽友人孫許緝高介士也與之揚風

屹雅二老風流識者每稱道之

林中鶴字天翥爲人耿介折節讀書作文選意選詞

憂憂獨造食餼於庠與修邑志時有黃兆琮廷碩

張黃卓鴻萬姚宏文纘虞並邑庠名宿

歸涵字淳澣世有隱操父天淇里稱長者涵爲詩文

宗其家太僕法應童子試邑令趙詢太僕支派涵  
 曰明公憑文校士何以家世為令器之居父母喪  
 盡哀服闋思慕不忘每事卜樞前後行生平以忠  
 恕自期志行為諸生冠

陸立詩太僕家風奕世楷書芽豈盡委塵埃斯文  
 此日憑公在吾道何人覺後來天上相須作賦手  
 人間老却濟時才辨香嗣是  
 為誰敬回首狂瀾淚滿腮

里有文章之士含咀六經畋漁百氏或鼓吹  
 休明或品題泉石雖顯晦殊途而力學窮經  
 一也

藝術

王貞爵字士修能詩工書精六壬術決策多奇中卒  
 後里人請仙憑几書休咎自署為酒顛蓋其生時  
 自號也子渭熊字汝師飛筠字翼師克紹家學以  
 壽考終

姚鎔字鑒青書法南宮畫宗小李作詩直寫性情天  
 真爛然同學於景燾工篆刻得鎔指授云

王貞儒字士珍業岐黃洞曉素問用藥有神解所投  
 立起族子約之受成德幾世其業德幾字履和邑

諸生工時藝

陳澍字熨望慈和友愛工書法明醫理子倫表有父風孫庠生啟謨字西周博識典故輯桃溪試言朱庭采字亮之攻瘍醫刀圭如神時有印寧之擅長小兒科名與庭采相埒

金址霑字雨三幼爲童子師能書善吟長通醫學精溫補所治輒愈遐邇爭迎之

李恬字于珍幼孤善病究心醫理遇疑難症能出獨見以活之俗呼李仙其徒程思洛字錫疇療疾亦奇中以不善趨時名未甚顯恬子式如

范儀普字王臣授童子章句造就有方書法陸文裕瑞麥賦里中斗錦箠頭多出其手同時奚聽濤施堂並能書

於登奎字覲容景熹從子與秦之相並工丹青高自位置少所許可時人大怪之

周有文字晉叔祖孟陽業儒精醫見樸村集從祖廷錫叔孫錦儒醫望重有文性謙退好談鋒急人貧病保嬰一術最爲神妙

卷三十一  
五  
小道可觀聞之卜氏况游藝實志道之終事  
豈以雕蟲小技而棄之

列女

徐氏名懿順陵縣知縣甘元雋子諸生應麒聘妻未  
嫁夫亾請詣甘送葬父母不許自經死詔旌

趙氏定陶知縣俞妹儒士江楨妻二十四歲夫亡撫  
姪爲嗣守節五十年坐卧一小樓親戚罕見其面

禮部尙書韓菼匾獎

趙俞詩少陵有妹在鍾離痛汝酸辛又過之一死  
一生方弱歲無兒無食欲誰依伶仃如此心誠苦

衰白同余髣亦絲地下老親  
差足慰清輝真是照門楣

王氏諸生暹女年二十五歸李輔世婚二月連喪舅  
姑又八月夫亾氏撫字二小姑以俟其嫁念父母  
老無措預備附身之具小叔名世重嫂之貞奉事  
甚恭以游京師客死氏終身紡作自給疾亟終具  
皆自飭孀居三十載張徵君有傳

朱氏張文溫妻二十三歲夫亡守節三十九年

羗氏庠生李嘉譽妻二十九歲夫亡守節孫議叙州  
判肇夏有行畧



水氏江振興妻二十九歲夫亡守節六十年

陳氏張源長妻二十歲夫亡嗣子庠生遇留娶張氏

旋歿卒張時年二十五姑媳相依並以節著

張氏橫港燧女大場殷又元妻二十歲夫亡終身不

櫛沐燧族子靖方女適南翔監生程立年一月夫

亡與燧女先後歸橫港苦守以老

張氏李元白妻二十九歲夫亡撫孤恬成立邑令王

公標給匾曰雪格霜稜

金氏張雲妻二十八歲夫亡守節三十年郡守陳公

鵬年給匾曰苦節自甘

楊氏桂元彩妻二十四歲夫亡元彩弟庭彩妻李氏

二十六歲夫亡楊守節四十三年李守節三十四

年雙節坊建里南

洪氏張維翰妻二十三歲夫亡守節三十二年

張氏林定甫妻二十九歲夫亡守節三十二年撫孤

起凡成立議叙州同知

沈玉樹林節婦詩茹荼三十載始信立孤難破鏡  
春常掩啼珠夜不乾齋心飯佛乘苦志和熊丸骨  
節冰兼玉兒孫桂與蘭門庭纔似舊歲月忽云殘  
婺彩天邊暗霜華帳底寒蓋棺事始畢同穴願方

完遺事留彤管  
摩挲不忍看

張氏朱壽生妻于歸二載夫死撫遺腹子天球入邑  
岸娶媳李氏四載天球卒姑媳相依李先歿張年  
七十一慟而絕邑侯程公尹起旌曰雙節聯輝

陳氏金瑞甫母苦節六十餘年

葉氏監生陳大倫妻

甘氏陳德明妻二十九歲夫亡守節二十四年坊建  
南街

吳氏施于明妻二十九歲夫亡守節四十八年坊建

元元觀前

倪氏職監於景濂妻昌化知縣上鈐妹二十六歲夫  
亡守節五十三年撫孤覲丹成立坊建里北

陶氏張大烈妻二十四歲夫亡守節三十六年坊建  
張家港

李氏諸文漢妻二十六歲夫亡守節五十一年坊建  
奚家杠橋

李氏張文達妻二十四歲夫亡守節二十八年坊建  
里東

嚴氏王志鳳聘妻十五歲志鳳夭過門守貞五十年  
坊建芝行

張氏李正春妻二十九歲夫亡守節四十五年

陸氏符國興妻二十歲夫亡苦節四十年子泰有孝  
行閣學凌如煥給母節子孝匾

孟氏管文燠妻二十四歲夫亡守節四十年坊建管  
街

符氏儒士程溥妻十七歲夫亡守節現年七十四坊  
建北街

張氏雲景女許字徐成斐未嫁夫亡守貞五十一年  
雲景族子謨聘妻嚴氏守貞二十年閨蜚語絕食  
死庠生張爲金作兩貞女傳嚴媳萬氏婚一載夫  
敬字天亦以節顯

孟氏金以承妻二十三歲夫亡守節坊建許家橋

柴氏張允文妾十七歲允文亡苦節五十餘年

李氏朱屏侯妻二十歲夫亡守節子亮彩

金氏馬志和妻二十六歲夫亡守節六十三年邑侯

胡公仁濟給獎眉壽完貞匾額

張氏儒士侯珣妻珣字玉田嗜古善琴臨卒有永訣詩時氏二十七歲守節五十四年邑令胡給匾獎之珣姪宸章妻黃氏亦以節孝稱

姚氏李德珩妻二十三歲夫亡守節五十六年撫姪義永為嗣有善行

管氏張啟賢妻二十歲夫亡孝養兩姑終身素服

河間烈女事實無考見復齋詩鈔

孫許緝詩羣嗟玉隕與珠淪永樹芳標萬古新弱質偏能成大勇稚齡竟爾作完人黃泉詎掩松筠操白日難融冰雪身倘使鬚眉咸鼓舞士林若個不成仁

金氏潘以敬聘妻知書史未嫁夫亡過門守貞力勤操作以事舅姑

楊氏莊公藝妾年二十公藝死有子三歲苦守撫孤養衰翁以老

張氏楊玉符妾守節撫嫡子成立邑令李給獎節比花孫匾

徐氏周秉常妻二十八歲夫亡守志撫孤孤又早夭苦節二十年

張氏李振宗妻夫亡守志苦節五十五年

陳氏李文榮妻二十四歲夫亡守節六十年

秋節婦二十八歲夫亡苦節三十餘年

陸立傳秋節婦者不知其姓初為吳氏婢名福姐  
嫁秋某生二女而秋亡里人易之猶稱之為福姐  
家極貧饗殮時不給或諷之改適掩耳而走苦守  
三十餘年撫二女俱嫁卒完其志云節婦距余家  
僅百步每來問先孺人起居先孺人閒伏以錢米  
節婦輒佐先孺人執爨或浣濯補綴若傭工以報  
者先孺人益憐重之命余兄弟呼為大娘而不名  
先孺人卒節婦哭之哀由是里中人稍稍知尊節  
婦矣論曰貞節義烈之事何地無之單門小姓後  
起無人名湮沒而不彰如秋節婦者可喟也嚮余  
假館侯君成玉家君齒長於余知節婦事甚悉每  
稱述不置口及里志編竣列女傳中闕節婦名侯  
君舉以示余因綴其言合  
余幼所聞見者著於篇

宗烈婦居界浜夫與盜通氏堅拒不從扼吭而死

黃氏葉元升妻二十七歲夫亡守節現年六十

李氏徐殿宸妻二十二歲夫亡守節現年六十一

李氏陸昌世妻二十四歲夫亡守節現年五十

朱氏張時邁妻二十九歲夫亡守節現年五十二

婦女生長閨中不幸所天早世而能砥節自

誓之死靡他蓋亦難矣吾里僻在海濱而以

苦節著者比比土風固然抑亦

聖化之隆也凡已旌未旌已故未故咸確訪而備

錄之無使或遺焉

真如里志卷四

里人陸立价人編輯

流寓

蔡長不知何許人狀貌魁梧多膂力善飲啖明末自松江來里中侯伯宣見而異之爲授館與之語有不可一世之槩終其身未嘗自言名字以形長故謂之長或曰蔡亦非其姓

陳忠任武職隱名結廬桃浦與蔡長陸景淳上谷諸子相友善時有捍衛里黨功

陸景淳字師古上海學士文裕深來孫經明行修所  
 至以詩文雄壇坫上谷氏延主師席遭世變絕意  
 進取不言時事學者稱隨菴先生著四書合叅二  
 十卷弟濟

陸濟字公謙贅里之侯安國家文行如景淳擅長繪  
 事著畫史竹譜行世子天錫字思順孫文然字裕  
 可孝友文學為諸生祭酒上谷氏先後館之名雋  
 爭從其游兩世詩文曹黃門一士題曰二陸詞翰  
 卽用董文敏品其祖文裕及岑句詳上海志

附陸濟桃溪訪舊詩愁聽兼旬雨欣看霽晚天舟  
 乘新漲水柳拂隔溪烟生意舒芳徑晴光遍野田  
 桃花開遠岸  
 曲曲到門前

張禮字儼思嘉定匠門太史從孫修行纘文館里某  
 氏某故巨室會家難及庶孽禮多方調護之俾自  
 發憤以科目顯弟詩字原雅工詩文著何菴集亦  
 授經里中

尹聘字商衡大場人登丁酉鄉榜經學淵深為文操  
 筆立就未嘗屬稿兩次割股愈親疾里人重其文  
 行設賓榻延致之著梧岡集

施燧字禱石兵部郎鳳儀孫居江灣長於詩文名重  
大江南北里人甘實學張彥求延主家塾兩家子  
弟經其指授皆以文學知名燧中雍正癸卯副乘  
有筠坡詩文稿

巴來字葯青徽籍寓秦公廟能書善竹枝體卒葬於  
廟後

姚埴棠原名懋崇字德超家大場性穎敏弱冠以詩  
文名工四體書精錢筆授徒里東清河氏年未三  
十歿輯有金石韻府五卷

陸立詩少小沉酣翰墨場詩宗李杜字宗  
王清風芳桂依然在想像臨池神黯傷  
附姚埴棠題黃克家濯足圖濯足誰家子展也江  
夏黃丰神何瀟洒飄飄得喪忘不慕朝市跡結廬  
桃溪傍俯臨萬里流仰跂千仞岡披圖想君風詎  
不高且長宏鶴千歲姿蒼松百尺強渺矣此中趣  
願與共  
徜徉

蕞爾地而有名流至止人以地重乎實地以  
人重也搜羅編輯借光多矣

### 方外

本源字元菴金壇人寄錫真如寺遷甘露菴工詩世  
傳其佳句如雲蓋三椽屋池分半畝居菜香夢醒



花間蝶飯熟雲留竹裏人詩致清遠多類此有翠  
微閣集

丁癡小字傳畢生裸體冬月坐冰穴中或與之衣不  
服詰之則曰爾生時曾有衣服帶來否日執一磚  
裹之以布終不釋手

上晏字雪松居真如寺工書善詩不屑道釋子語學  
士多與之倡和後寄錫上海鐸菴預刻死日兀坐  
而寂

萬慈居秦公廟素食戒行喜儒書善橘戲日與檀越

### 談詩下棋以爲樂

半修字見性受衣鉢於雪松通內外典兼工翰墨由  
柰山指松庵來主真如寺尋歸柰山以老

方外爲異學儒者諱言之然其撇却塵寰從  
容羽化非操修有得何以臻此姑附於人物  
志之後

祥異 賑卹附

明嘉靖二十九年 庚戌 六月十三日龍鬪

三十二年

癸丑 雞妖 里金文陞家  
雌雞化爲雄

真如里志 卷四

萬歷十年壬午歲饑張檯捐資煮賑橫港里人

國朝

康熙四年乙巳秋有虎

雍正八年庚戌十二月二十六日地震

十年壬子七月十五日大風潮三晝夜歲大禳

詔賑濟平糶時衿耆汪柯仙甘實學桂曜陳文錦黃天祿朱永祥陸用和等捐貼江灣

賑煮

十一年癸丑夏麥稔大疫

乾隆二年丁巳春鬼嘯其聲呖呖若千萬鬼數里外人皆聞之卒無他異

真如里志 卷四 祥異 五

此孽是何徵水災已可斷受謝春方過入夏雨瀾  
 漫愁雲兼慘霧連月終無曠大浸欲稽天陸沉倒  
 墻塌他邑淹禾苗穢沒委堤埠吾土壤木棉久漬  
 青囊爛老農喪氣吁相告心驚惋四顧何所有祇  
 添愁一段星雷與墳羊何以脩丞衍相率報荒由  
 哀控我侯案我侯洞民情上言何侃侃憲檄賜緩  
 征人情不錯亂暫舒眼前憂忍飢毋逃竄嗷嗷待  
 哺家漏卮終難灌揭債券成文富室已閉閤器物  
 罄所藏一錢等千貫閉糴客商稀米價三倍半伐  
 木賣為薪古樹莫留榦始食仰園蔬猶存菜及蒜  
 既而齧荳渣糠粒如白粲糊塗煮草根不粒軀殼  
 悞鳩鵲漸成形形小踵反胖拽踵攫街衢棲息止  
 寺觀無絮暴足腓破衣不至斃枵腹抗霜威日暮  
 難保旦殞死無親收草捲委堤岸亥冬物已耗子  
 春人更瘡鬻兒三百錢番船作奴喚如此長別離  
 臨岐不復看賣妻一斛米他家侍翠幔燕婉無良  
 期破鏡終相判提携本天性鞠凶始離散恩愛兩  
 不虧蓮厄相背叛念之鼻為酸惻惻心難按幸賴

大父仁憂黎軫宵旰多方療民膜設粥為官爨勸  
勉富家翁齋助共相贊蒙袂與輯屢買買趨粥館  
天朝有 綸音遐邇奉渙汗發賑且博施免厥  
墜塗炭盼盼麥秋來還覺夜曼曼至此民少甦疫  
癘又相絆天札因災荒怨氣甚慄悍餒鬼漁所欲  
有錢孽可追馨香或不敷滅命將魂斷櫬槨滿城  
隅殭屍積河畔流脂欲成川穢氣冲霄漢麻髮出  
門多人物盡彫換竊盜肆噬吞村落咸扼腕寡弱  
蒙其殃却似蟻遭鶴羣萃如蝟毛難禁以狴狂嗟  
嗟民生艱手足無措扞耆耄且寒飢少壯不婚冠  
蒿目我心傷作此亥子嘆所祈 仁聖君安輯海  
波瀾有年太史書報賽用圭瓚愿者安於農毋貪  
逸與嘖髦士俱攸宜濟濟在靡泮惟我卧義皇髯  
几將書攤餽粥有盈餘興到弄柔翰四隩已清平  
雖貧何足算

二十五年庚辰二月朔酉刻地震

二十六年辛巳十月九日有虎至北楊宅傷人知縣李率兵捕之不獲

冬大雪嚴寒彌月竹柏多槁死

二十七年壬午七月十二日大風雨

二十八年癸未九月朔日食既十月十一日大雨雹

傷畜物無數明年百果不實

二十九年甲申五月二十八日未時地震劉翰周家雄雞生蛋

狀如雞卵子有殼無黃

三十四年巳丑秋彗星見廿日乃滅

三十五年庚寅五月朔日食十月九日大雷電雨雹

三十六年辛卯七月四日大風雨

藝文

靜軒集

農桑風化錄

辨疑錄

恤刑錄並陳述

樗軒集李良

傳世錄李魁春

李氏宗譜侯明勳

北堂詩草甘肅

碧煙小草張涵

侯氏家乘陸景淳

孟子畧釋

孝經畧釋

四難記

暇日詩編

可名公集

達生編並柯灼

鞠菴草侯廷宰

渤海族譜甘繼祖

吹萬堂集符兆昌

詒穀堂尺牘王暹

陸氏宗譜陸廷德

地理指南張元治

最樂堂詩草甘杰

酒顛道人草王貞爵

樹滋堂稿姚旂常

忠宣房譜范師周

南北史摘要

南北史詩

文選評釋

陶杜韓蘇詩評

橘社倡和

西湖冷吟

樸村文集 並張雲章

尚志堂稿 侯楷

記曾錄 張雲從

竹軒草 侯林

書禮釋要 張立方

王孝子贈言 王渭熊輯

濟陽三世詩稿 蔡景謨時禹東

南化紀聞 張雲蔚

懋齋詩鈔 張雲揚

米堆山人詩文鈔 張揆方

陳鵬年序同夫世兄天姿駿發學有淵源百花一帙驚才絕艷亦復別有寄託不徒以賦物為工也所謂初日芙蓉披錦列繡庶幾兼之

辨惑論 沈步青

稼軒集 侯瑞隆

顏氏醫典註 侯瑞豐

墨庄詩存 繆開泰

襄城縣志 侯傳山

蓉城詩草 王冠英

升恒餘慶 甘宗懋

恩榮堂壽詩

醉餘畫譜 並陸永堅

七表贈言 范楚珍

陳時叙序鳴玉范丈系出宋忠宣公居桃溪以醫隱余妹倩錫川侯君价人陸君數為余言其為人雖未謀面而心識之丈今七十有九齡舉案齊眉一堂四代明年將大慶焉茲出其七十贈言若干首介价人索題於余聯珠綴玉可詠可歌於以知丈之仁心仁術與夫承先而啟後者信有徵也爰題數語而歸之

後天立極圖解 侯淦

錦囊心法 程倬

世澤彙編陸立

贅齋詩草林丙鸞

歸涵跋余讀陸氏世澤彙編其先世文章勲業照耀史乘未易更僕數而閨閣之賢如曹太君不欲其子為市人寶山翁配張孺人本大姑遺命為价人勗楊廣文自怡侯孝廉瑞隆稱有孟歐風不信然歟余故表而出之以俟論定於後之君子

軼事

里有姚生者構怨於母弟陸某陸充糧長乘馬夜歸生偵至中途捺刀伏橋下馬覺之而陸已殺矣馬逸歸對陸妻驚嘶不已若有訴狀妻知其夫死非命持燈馬尾至橋夫果死泣謂馬曰夫屍雖得如

正犯未獲何馬即前行首鼓生門生出啣之蹴之其妻執以赴官取馬狀情實棄生市

姚翁宏榮居鄉多長者之行一日謂子眉保曰陰司

鑒余正直命為某都土地涓某日時赴任可預備

蔬菓以犒從者屆期家人如命陳設親友環坐言

笑自若及卒時刻不爽橫港張禧虹橋潘庸歿時

皆言某處來迎為神無疾而化二人亦長者云

玉蟹橋西嚴氏聚族而居園生一笋重數十觔嚴族

剖食之尋皆死亡無子遺惟一支出外不食者獨

存卽巖永昌家也永昌暨子沾祿俱有孝行云

阮魁士

陸鎮鈞宜校梓

鈴在田

